

Ka mutu nga korero, ka whakatakotoria e A. T. Ngata te motini, a na Hori Tupaea i tautoko:—

Ko te whakaaro o tenei Hui ko te Pihopa tuatahi mo te Pihopatanga o Aotearoa, hei te Maori.

Ka menemanatia e Hori Tane, a na Hemi Te Paa i tautoko: **Ko te whakaaro o tenei Hui ko te Pihopa tuatahi hei te pakeha reo Maori.**

Te pooti tanga mo te menemana tokowaru i whakaae, tokoitu i whakakahore.

Katabi ka hoki ki te motini. Te pooti tanga ka paahi te motini 9 ki te 8.

I te riterite rawa o nga pooti kaore i tino tatu nga whakaaro o te Hui.

Ko nga motini i muri iho he tuku whakanui ki nga rangatira Maori o Ponake mo te nui o ta ratou manaaki i nga mema o te Hinota.

I muri iho ko tu a Ngata ka whakaatu i tona whakaaro kia karangatia he hui ma te Hahi Mihingare kia tu ki Rotorua. Na Ngata te motini na Wiremu Kingi i tautoko: **Kia karangatia he hui ma te Hahi Mihingare kia tu ki Rotorua a te marama o Maehe 1927 mehemea ka whakaaetia mai e Te Arawa ki reira te tuunga o te Hui.**

Paahitia ana.

No te Paraire te 6 o nga ra o Akuhata i te 10 a.m. ka hui tahi atu nga mema o te Hinota Maori me nga Pihopa me te Atipihopa, te Pihopa o Waipatu, te Pihopa o Ponake, te Pihopa o Nelson me te Pihopa o Christchurch.

He roa te wa e whiriwhiri ana te Hinota Maori me nga Pihopa i muri iho ka paahitia e te Hui Maori enei motini e mau ake nei:—

1. Kei te pouri nga mema o te hinota notemea kaore i tino tatu o ratou whakaaro me pakeha, me Maori ranei he Pihopa tuatahi mo te Pihopatanga o Aotearoa, a mehemea kua kite iho nga Pihopa kua kore he take e kumea ai tenei hui kia roa, e tono ana tenei Hui kia hikitia te whakatau mo tenei take ki te Hinota Topu Nui e takoto mai nei."

2. "Me whakarite ko te Hon. A. T. Ngata me Rev. F. A. Bennett hei mangai whakatakoto atu i nga take a tenei Hui ki te aroaro o te Hinota Topu Nui."

Na muri iho ka hui tahi ano nga Pihopa me nga mema o te Hinota Maori. He roa te wa e whiriwhiri tahi ana i nga kaupapa katoa o te take nei. Te mutunga iho ko paahitia te motini e mau ake nei.